

Regional News Unit AIR Aizawl

Monday, April 22, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- MPSC hna lak dana thil fel hlel awm ni a puh chhui chian hna chu peihfel thuai a ni dawn tih a chhuitu tura ruat Pu Michael Lalmanzuala chuan a sawi.
- Mizoram Lok Sabha bial inthlanna a vote tlate chu Aizawl leh district dang 10-a pindan awmkhauh chhungah dah luh kim vek a ni tawh
- Tun thla ni 26-a vote thlak tur Lok Sabha inthlan thawh 2-na campaign-in a vawrtawp a thleng mek.
- Nichin dar 7 atang khan Manipur-a polling station 11-ah Lok Sabha inthlan thawh 1-na vote thlak that leh a ni.



INQUIRY

MPSC hna lak dana thil fel hlel awm ni a puh chhui chian hna chu peihfel thuai a ni dawn tih a chhuitu tura ruat Pu Michael Lalmanzuala chuan vawiin emaw naktukah emaw hian a report a peih hman a rin thu a sawi.

Pu Lalmanzuala chuan an hna hi sorkar pisa kal ni, ni 2 chiah an la khawih hman niin a sawi a. A thil chhui-na-ah hian sorkar chuan amah pui turin deputy secretary pahnih an pek thu leh MINECO a Secretariat-ah pisa tur an ruahmansak thu a sawi a. MPSC a thawkte chawlhtir rih an nih lai-in an document duh angte pe thei turin thawktu thenkhat chu pisa an kai phalsak a ni, a ti. Report hi thehluh theih thuai a inbeisei thu Pu Lalmanzuala chuan a sawi a ni. Puan tawh angin MPSC-in Combined Civil Service leh sorkar hna dang a lak danah thil fel lo a awm ni a puhin MZP chuan MPSC chairman Pu JC Ramthanga chu bang turin an phut a. A ban loh avangin kar kal ta Thawhtanni atang khan MPSC hnathawkte pisa kal tur an dang a ni.

Pu Lalmanzuala chuan Nilaini leh Ningani chauh kha sorkar pisa kai ni a hna an thawh hun a nih thu a sawi a. Inthlan vote thlak ni, Zirtawpni bakah Inrinni leh Pathianni a tlak leh avangin sorkarin ni 7 chhunga a report thehlut tura a tihna-ah sorkar pisa kai ni, ni 7 a tih kher avangin hun an la neih tam thu a sawi a. Chuti chung chuan tunah hian a report hi a hmawr a bawk thei hnai niin a sawi a ni.

Thawhlejni (April ni 16) khan Mizoram sorkara Vigilance Secretary chuan MPSC hna lakna a thil fel lo awm ni a sawi hi chhui chian hna chu peihfel thuai a ni dawn tih a chhuitu tura ruat Pu Michael Lalmanzuala chuan vawiin emaw naktukah emaw hian a report a peih hman a rin thu a sawi.



EVMS/VVPATS IN STRONG ROOMS

Mizoram Lok Sabha bial inthlanna a vote tlate chu Aizawl leh district dang 10-a pindan awmkhauh chhungah dah luh kim vek a ni tawh a, venhimna khauh tak ruahmanna hnuai a ven a ni.

Additional Chief Electoral Officer Pu H. Lianzela'n Akashvani Aizawl a hrilh danin Zirtawpni a polling station 1,276 a inthlanna buaipuitute chuan an district khawpui thleng kim vek tawhin EVM leh VVPAT te chu venhimna khauh tak hnuai-ah Aizawl leh district khawpui 10 dangah pindan awmkhauh chhunga dah kim vek a ni tawh. Inthlanna a vote tlate hi ramchhung hmun dangte rualin June ni 4 khian chhiar a ni dawn a ni.

Vote chhiar nan hian Counting Centre 13 awmin Counting Hall 40 a awm ang a, Assembly bial pakhatate vote tla zel kha counting hall pakhatate chhiar a ni dawn a ni. EVM leh VVPAT a vote tla zat hi endik (scrutiny) hna thawh a ni tawh a ni. Scrutiny tih zawh hian vote awm zawng zawng nuai 8, sing 5, sang 6 leh 364 atangin vote nuai 4, sing 8, sang 7 leh 103 a tla a. Vote tla zat hi za zela 56 point 87 a ni. Mipa nuai 2, sing 4, sang 1 leh 213 leh hmeichhia nuai 2, sing 4, sang 5 leh 800 in vote an thlak a. Postal Ballot hmanga vote tla leh Electronically Transmitted Postal Ballot System (EPBS) hmanga vote tla te chhiar tel a la ni lo.

Kumina Lok Sabha inthlan vote thlakna-ah hian kum dang ngaihtuahin EVM leh VVPAT chhia thlak ngai a tlem hle niin thuneitute chuan an sawi a, Mizoram pumah EVM a Ballot Unit (BU) leh Control unit 10 ve ve chauh thlak ngai a awm a. VVPAT 25 thlak ngai a awm bawk a. Kumin inthlanah hian Electronics Corporation of India Limited (ECIL)-in EVM tha leh rintlak zawk an siam chhuah hmangin Mizoram pumah vote thlak a ni.

Zirtawpni a inthlan vote thlak ni khan Mizoram pumah Mizoram Police mi 3,553 leh Central Armed Police Force (CAPF) company 12 te'n venhim hna an thawk a. An zinga engemawzat hian EVM leh VVPAT dahna pindan awm khauh venhim hna an thawk zui a ni.

Mizoram mipuite chuan Lok Sabha Mizoram bial incandidate 6-te dinhmun tur chu an rel fel sak tawh a. Rorellai ZPM candidate Pu Richard Vanlalmangaiha, MNF candidate Pu K. Vanlalvena, Congress candidate Pu Lalbiakzama, BJP candidate Pu Vanlalhmuaka, MPC candidate Pi Rita Malsawmi leh independent candidate Pu Lalhriatrenga Chhange te chungchanga mipui thutlukna chu June ni 4 khian hriat theih a ni dawn ta a ni.

<><><>

CYMA

Central YMA chuan tun hnai khan Mizorama an sahimna atana awm mek Myanmar, Bangladesh leh Manipur atanga rawn tlanchhiate chu Mizorama an awm chungin ram dan leh khawtlang inrelbawlina zawm turin a ngen.

Central YMA chuan ram dan leh khawtlang duhdan bawhchhe lo turin raltlan zawng zawng an ngen a. Ram dan kalha sumdawn leh ruihhlo laka inhnamhnawih lo tur leh khua-leh-tui tha tak anga khawsa tura beisei an nih thu an tarlang. Ramdangmite'n sorkar hriatpui leh phalna lo chuan ram leh in an neih theih loh avangin YMA-in hriatpuina a ziah theih loh thu tarlan a ni a. In leh dawr luah man chungchangah mi in leh dawr luah lai a aia luah man sang zawk emaw a luahlan leh luahsak loh tur a ni. Myanmar leh Bangladesh atanga raltlante hi India mi an nih loh avangin India mi chauhvin an neih theih Voter ID card, Aadhaar Card, Birth Certificate, Tribal Certificate, Residential Certificate, Indian Driving Licence leh lirthei registration te an ti tur a ni lo, an ti a. Dan phal loh thil leh ruihhlo hmanga sumdawnna do kawngah sorkar leh khawtlang an thawhpui tur a ni, an ti bawk.

Raltlante chu an awmna ngai a, awm reng tura beisei an nih thu leh branch, group leh sub-headquarters YMA hruaitute'n mahni huam chhunga raltlante dinhmun zir Chiang a vil reng tura beisei an ni a. Zofate an nih avangin tanpui an ngaih chuan theihtawpa tanpui turin an ngen bawk a ni.

<><><>

DRUG-RELATED DEATHS

Kuminah ni 100 chhungin ruihhlo hman sual avangin Mizoramah mi 27 an thi tawh.

Excise and Narcotics department-in an chhinchhiah danin kumin January ni 1 leh April ni 12 inkar chhung khan ruihhlo avangin Mizoramah hmeichhia 6 leh mipa 21 an thi leh hman tawh a. An zinga mi 18 hi heroin a inchiu thin an ni a, mi dang 9 chu heroin leh damdawi dang hman kawp vanga nunna chan an ni. Kum 1984-a Excise and Narcotics department-in ruihhlo avanga nunna chan mipa pakhat, heroin hmang thin an chhinchhiah tan atangin tun thleng hian ruihhlo vanga thi hi mi 1,839 an awm tawh a, an zinga 1,616 hi mipa an ni a, hmeichhia 223 an awm tawh bawk. Ruihhlo vanga thi zinga mi 1,161 hi proxyvon leh parvon spa vanga thi an ni a, mi 427 chu damdawi dang hmang an ni a, heroin vanga thi hi mi 251 an awm a ni. Nikum khan damdawi hmansual avangin mi 76-in nunna an chan a, an zinga 64 hi mipa an ni a, 12 hi hmeichhia an ni. An vai hian heroin leh ruihhlo dang khawih pawlh vek an ni.

Mizoram hi Golden Triangle leh hmun dang ruihhlo siam chhuahna atanga Myanmar kal tlanga dan kalha ruihhlo tawlhna kawngpui ber pakhat a ni a. Kum 2021 February thla a Myanmar a mipui thlan sorkar paihthla a sipaite'n thuneihna an hnehchhuh atang khan nasa takin ruihhlo tawlh ruk hi a pung a. Dan kengkawhtute'n ruihhlo an man thin pawh nasa taka pungin tum khata an man pawh a hlawm a lian hle a ni.

<><><>

CAMPAIGNING AT PEAK FOR SECOND PHASE OF GENERAL ELECTIONS

Tun thla ni 26-a vote thlak tur Lok Sabha inthlan thawh 2-na campaign chuan a vawrtawp a thleng mek.

Campaign theih hun chhung ni hnih-khat chauh a awm tawh avangin political party hruaitute chu an candidate tana vote zawngin ngawrh takin an campaign mek a. Lamlianah leh kawthlahahte campaign thawm a in rik chhawk zut a ni.

A thawh 2-naah hian Kerala-a seat 20, Karnataka-a seat 14, Rajasthan-a seat 13, Uttar Pradesh leh Maharashtra-a seat 8 ve ve, Madhya Pradesh-a seat 7, Assam leh Bihar-a seat 5 ve ve, West Bengal leh Chhattisgarh-a seat 3 ve ve bakah Tripura leh Jammu and Kashmir-a seat khat ve ve-ah inthlan a ni ang.

<><><>

RE-POLLING ANNOUNCED AT 11 POLLING BOOTHS IN MANIPUR ON APRIL 22

Nichin dar 7 atang khan Inner Manipur Parliamentary bial huamchhunga polling station 11-ah Lok Sabha inthlan thawh 1-na vote thlak that leh a ni. Tlai dar 5 thleng vote thlak theih a ni ang.

Election Commission of India chuan State Election thuneitu chu vote thlak that buatsaih tur hian a hriattir a. Heng Polling Station-ahte hian vote thlak ni, Zirtawp ni khan tharum thawha intualvuak a ni a, inthlanna khawlte pawh tihchhiat a ni.

Vawiina vote thlak thatna tur Polling Station 7 chu Imphal East district chhung ami a ni a, a dang 4 chu Imphal West district chhung ami a ni.

Vawiina inthlan thatna turah hian felfai leh tluang taka vote thlak a nih theihna turin venhimna pawh ruahman belh a ni.

<><><>

PRESIDENT DROUPADI MURMU TO CONFER PADMA AWARDS AT RASHTRAPATI BHAVAN

President Droupadi Murmu-i chuan vawiin hian Rashtrapati Bhavan-a inkhawm buatsaihah India civil mite chawimawina sang Padma Award a pe chhuak dawn.

President chuan Vice President hlui M Venkaiah Naidu leh lam thiam Dr Padma Subrahmanyam hnenah Padma Vibhushan a hlan dawn a. Padma Vibhushan vek hi boral tawh Bindeshwar Pathak pek a ni baw k ang.

Lemchan thiam Mithun Chakraborty leh zaithiam Usha Uthup-i hnenah Padma Bhushan hlan a ni dawn a. Padma Bhushan hi rethei chanhaite thil pe thin Dr Sitaram Jindal te, lung natna lama mithiam Dr Tejas Madhusudan Patel leh Uttar Pradesh Governor hlui Ram Naik-ten an dawng dawn baw k a ni.

<><><>

TWO JAPANESE MILITARY HELICOPTERS CRASH IN PACIFIC OCEAN; ONE DEAD, SEVEN MISSING

Tokyo chhim lama Japan sipai helicopter pahnih chesualah sipai pakhat a thi a, midang 7 an bo.

Helicopter chesual hi Pacific tuifinriatah an tla a, an tlak hma hian an insu a nih rin a ni.

Japan Defence Minister Minoru Kihara chuan Maritime Self-Defense Force (MSDF) helicopter 2-te hi tuipui-ah an training a, Torishima thlirkar bawr vela an awm laiin an be pawp zui thei ta lo tih a sawi a ni. Helicopter-a chuang mi bote zawn hna hi ngawrh taka thawh mek a ni.

<><><>